

Akilerarusiinernik Aalajangiisartut aalajangiinerat

Kinaassutsimik uppernarsaaneq 2019-12723

Aalajangiisoqarpoq: 4. novembari 2019

Aalajangiinerup tamanut saqqummiunneqarnera:

Ukioq isertitaqarfiusoq 2018

Sammisaq: Akileraarutit

Sammisami oqaatsit atorneqartut: Ingerlatsinermut aningaasartuutit, nalikilliliinerit, taarsigassarsianik akilersuinerit.

Eqikkaaneq

Akileraarnermut Aqutsisoqarfimmit umiatsiaaqqamik pisinermut taarsigassarsianik taarsersuivivit ilanngaatigineqarnissaat itigartitsissutigaaq. Akilerarusiinernik Aalajangiisartut taarsigassarsianik akilersuinerit ilanngaatigineqartussaanninnerat isumaqataaffigaat taamaattorli ernianut aningaasartuutit uppernarsarneqarsinnaasut ilanngaataasinnaasut nassuerutigalugit.

Suliassami pissutsit piviusut

Naammagittaallioortoq umiatsiaararsiuutissaminik XX-imut aningaasanik taarsigassarsisimavoq aamma taarsigassarsiani nammineerluni nalunaarsukkamini ingerlatsinermut aningaasartuutit ilanngaatigisimavai.

Akileraarnermut Aqutsisoqarfimmi taarsigassarsiat ingerlatsinermut aningaasartuutaanngitsut tunngavilersuutigalugu akilersuutit ilanngaatigineqarnissaat itigartitsissutigineqarpoq. Akileraarnermut Aqutsisoqarfimmi umiatsiaaraq nalikillillugu ilanngaatigineqarsinnaasoq nassuerutigineqarpoq.

Taarsigassarsiat ernianullu aningaasartuutit Akileraarnermut Aqutsisoqarfimmut nalunaarutigineqarsimanngillat naammagittaalliummilli suliarinninnermi paasisutissat pissarsiarineqarsimapput.

Naammagittaalliuuteqartup paasinninnera

Naammagittaallioortup XX-imut akilersuutini aalisarnermik ingerlatsinermi aningaasartuutit isigai taamaattumillu akilersuutini ingerlatsinermut aningaasartuutit ilanngaatigineqarsinnaasut isigalugit.

Inatsisitigut malittarisassanut inatsisitigullu periaatsinut innersuussinerit

Isertitanik akileraarutaasussanik naatsorsuinerni ingerlatsinermut aningaasartuutit aningaasartuutit ukiup ingerlanerani aningaasarsiat piniarnerannut, isumannaalliniarnerannut allanngutsaaliorniarnannullu aningaasartuutit nassuiarneqartut ilanngaatigineqarsinnaapput. Una takuuk. Aningaasarsianit akileraarutit pillugit Inatsisartut inatsisaat nr. 12, 2. novembari 2006-imeersumi § 24, imm. 1.

§ 24, Aningaasarsiat akileraaruteqaataasussat naatsorsomeranni ilanngaatigineqarsinnaasut:

*1) Ingerlatsinermi aningaasartuutit, tassa imaappoq aningaasarsiat piniarnerannut, isumannaalliniarnerannut allanngutsaaliorniarnannullu ukiup ingerlanerani akissaajaataasimasut, taakkununga ilanngullugit akileraartarnermi nalikilliliinerit. Akileraartarnermi nalikilliliinernut maleruagassiat aammalu pigisat nalikilliliiffigineqarsinnaasut allamut tunineranni il.il. iluanaarutit annaasaqaatilluunniit akileraartarnermut tunngasumik suliarineranni maleruagassat naalakkersuisut aalajangissavaat,
2) aningaasat akileraartussaaitap pigisaanik, iluanaarutitaat aningaasarsiatut isigineqartunik, aserfallatsaalisaaanermut sillimmasiinemulluunniit atorneqarsimasut, aammalu
3) akiitsut erniaat, taakkunungalu atatillugu sullissinermut matusissutissatut ingerlaavartumik ernialiuttakkat (løbende provision).*

Akileraarusiinernik aalajangiisartut naliliineri tunngavilersuutaalu

Naammagittaalliuuteqartoq umiatsiaararsinissaminut XX-imit taarsigassarsisimavoq. XX-ip kontuata assilineqarnerat tunngavigalugu taarsigassarsianut akilersuutit erniallu immikkoortinneqarsinnaapput.

Naammagittaallioortup akissarsiaminik akileraarutaasussanik naatsorsuinerni taarsigassarsiaminut aningaasartuutini ilanngaatigisinnavaai kisianni taarsigassarsianut akilersuutit ilanngaatigineqartussaaitaanngillat. Taarsigassarsianut akilersuutit aningaasartuutaapput kisianni ingerlatsinermut aningaasartuutaanngillat ilanngaatigineqarsinnaasut. Taarsigassarsianik akilersuineq akiitsunik aningaasanillu, tamatumani ilanngaatit peereerlugit angusat assigiillutik, allatut taamaallaat agguataarineruvoq, aningaasat amerlasuut ikittulluunniit aningaaserivimmi kontumit akiitsunik akilersuutinut nussorneqaraluarpataluunniit apeqqutaatinnagu. Imaassinnaavoq akiitsut aningaasallu aningaaserivimiittut ikittunnguusut imaluunniit akiitsorpasuit aningaaserivimmi aningaasarpasuit - aningaasat atorneqarsinnaasut taakkuujuannarput, akiitsunik akilersuinernut aningaasartuutit kisiisa eqqarsaatigissagaanni.

Akerlianik umiatsiaaqqamik pisinermi aningaasartuutit akissarsiat akileraarutaasussat naatsorsorneqarneranni akileraarutitigut nalikilliliinertut ilanngaatigineqarsinnaapput.

Akissarsianik akileraarutaasussanik naatsorsuinerni akileraarutitigut nalikilliliinermut ilanngaatit akuersaarneqarput kisiannili ernianut aningaasartuutit ilanngaatigineqarnissaat akuersaarneqanngillat, tassami tamakku XX-imut akilersuinerni takuneqarsinnaanngimmata. Kontup assilineqarneranik pissarsineq tunngavigalugu ernianut aningaasartuutit ilanngaatigineqarnissaat Akileraarusiinerni Aalajangiisartut akuersaarpaat.

Akileraarusiinernik Aalajangiisartut aalajangiinerat

Akileraartarnermut Aqutsisoqarfimmi ukiumut isertitaqarfiusumut 2018-imut akissarsiat akileraarutaasussat XX-imut taarsigassarsianut ernianut aningaasartuutit amerlaqataannik ilanngarneqassasut aalajangersarneqarpoq. Taamaalluni naammagittallioortup Akileraarusiisarnernik Aalajangiisartunut naammagittaalliumminik ilaannakortumik akuerineqarpoq.

Inatsisitigut tunngavigisaq: Aningaasarsianit akileraarutit pillugit Inatsisartut inatsisaat nr. 12, 2. novembari 2006-imeersumi § 24.